

莆

陽

文

獻

林劉陳黃卓傳第二十七

林光朝字謙之少有聲場屋再舉禮部不第不復以得失為意聞吳中陸子正嘗受學於尹焞因往從之游自是遂專心聖賢踐履之學通六經貫百氏出入起居必中規矩稱為南夫子四方來從學者歲亡慮數百人其為教不專於詞章為進取計蓋以身為律以道德為權輿故自紹興以來四五十年士知洛學而以行義修飭聞于鄉里者光朝作成之也平生未嘗著書其於聖賢微旨有得於師傳者惟口授學者使之心通理解嘗曰道之全體存乎太虛六經既發

明之後世註鮮固已支離若復增加道愈遠矣孝宗
隆興元年光朝年五十始以進士及第授左迪功郎
袁州司戶叅軍未上乾道三年龍大淵曾覲以潛邸
恩倖進光朝與劉朔以名儒薦對頗及二人罪由是
光朝改左承奉郎知永福縣而大臣論薦不已召試
館職為秘書省正字兼國史院編修官實錄檢討官
六年四朝會要書成遷著作佐郎進國子司業兼太
子侍讀史職如故九年張說再除簽書樞密院事光
朝不往賀遂以直顯謨閣出為廣西提點刑獄淳熙
元年移廣東茶寇自荆湘剽江西薄領南其鋒銳甚

光朝督二將遮擊連敗之賊宵遁帝聞之喜曰林光朝
儒生乃知兵耶加直寶謨閣召拜國子祭酒兼太子
左諭德四年帝幸國子監命講中庸帝大稱善面賜
金紫不數日除中書舍人兼侍講是時吏部郎謝廓
然由曾覲薦賜同進士出身除殿中侍御史命從中
出光朝愕然曰是輕臺諫羞科目也立封還詞頭天
子度光朝決不奉詔改權工部侍郎請外以朝散郎
充集英殿脩撰知婺州引疾提舉江州太平興國宮
年六十五卒謚文節光朝老儒通練世務負士望甚
重在後省久未有建明呂東萊私謂所知曰未知此

老若爲收殺及繳駁謝廓然除命乃喜曰此舉過江
後未有也光朝既歿朱文公嘗嘆曰某少年過蒲見
林謙之方次雲說得道理極精細爲之踴躍鼓動退
而思之忘寢食及後來再過則二公已死更無一人
能繼其學者矣光朝所著文詞有集二十卷陳必序
之謂其森嚴奧美精深簡古上參經訓下視騷詞他
人數百言不能道者先生宜數語形容有餘劉克莊
亦謂高處逼檀弓穀梁平處猶與韓並驅世亦不以
其言爲過云姪成季從朱文公遊有學行嘉泰中特
科終興國軍判官

雖出宋史本傳并
名公事述等書

劉夙字賓之莆自林光朝倡聖賢踐履之學夙與弟
朔師事之得其傳夙擢紹興二十一年第調吉州司
戶叅軍添差建州教授以弟朔爲温州司戶迎母游
氏就養因乞與温州教授莫冲兩易以便親從之作
養人才多所成就孝宗即位召對除秘書省正字移
樞密院編修官以親老屢求去無何兼國史院編修
官夙曰求去以便私也美職可因而得乎力辭不就
除著作佐郎輪對首論馳射近侍備淮三事又以江
浙水奉詔陳得失乃上疏曰陛下與曾覲龍大淵革
觴味唱酬罷宰相易大將待其言而後決嚴法守裁

僥倖當自宮掖近侍始又及黃門溢格宰相臺諫不
振職及謹邊防辨才德凡六事丐外章再上以爲荆
湖北路安撫司叅議官以興化猶剝米病民請盡蠲
之乾道元以親老丐祠主管台州崇道觀三年差知
衢州期年政平訟簡會曾覿副賀金正旦道衢謁夙
不納復求去徙知温州明年引疾歸甫一年卒是歲
王龍學龜齡芮司業燁俱卒而夙復繼之呂祖謙悼
以詩曰今年襟上淚三泣萬夫雄林光朝谷士友慰
弔之書有云賓之愛君均於愛親憂國過於憂身古
有遺直今難其人其爲一時名賢之所推重如此餘

見第朔傳中風二子彌正彌邵

彌正嘉熙八年進士嘉泰初爲考功郎嘗爲朱子定謚曰文韓侂冑兵禍有萌使彌正如兩淮還言無故而先發天理不順無豫而輕舉人謀不從侂冑怒官終吏部侍郎子克莊莊出外公莊事述等書

彌邵字壽翁夙方盛年歿家貧有書數厨彌邵慨念先澤卧起其間不爲舉子業惟以學古爲心自六經以下莫不抄纂考論古今斷制義理一以沐浴關洛之語爲法事必求通理欲實踐自童至耄確然不移少以貧食於學後棄去郡博士俞來致學俸卻不受

郡守楊棟創導德堂於學宮以處之亦不久留及棟
提點福建刑獄復論薦于朝未報卒年八十二子成
由科第知古田縣遇禋需例授彌邵京秩諱已下憚
不敢白彌邵性狷介嘗質經於陳宓評史於鄭寅問
易於蔡淵自是之外罕與人接臨卒猶爲諸孫講張
栻集解孟子一章所著有易藁漢考等書藏於家
克莊字潛夫少有異質日誦萬言爲文立就嘉定二
年郊恩補將仕郎調靖安簿以宣教郎知建陽縣新
考亭祠祀朱范劉魏四賢于學糴賑糶倉二千斛方
以邑最聞而言官李知孝梁成大箋其所誄落梅有

朱三鄭五之句以謗訕摭其罪鄭清之力爲辨釋得
通判潮州改吉州端平初元有旨都堂審察除將作
簿爲閩帥真德秀叅議官改宗正簿二年除樞密院
編脩官兼權侍右郎輪對言服天下莫若公今失之
私鎮天下莫若重今失之輕又言權臣壞朝綱開邊
釁兵驕楮賤食糲僥倖之俗不可回諸賢起而當之
天人未應願堅疑初意無使邪說搖正論又言若川
之事出於迫脅向止議其罪不原其情近雖復其爵
未雪其冤皆人所難言尋除知漳州嘉熙元年改知
袁州坐先言濟王事爲御史蔣峴所劾與方大琮王

邁同罷歸旣而予祠遂擢江西提舉改廣東就升漕
檣船奉給例券皆卻不受買田二百畝以贍仕於南
而以喪歸者淳祐四年除江西提刑訪求民瘼讞釋
獄寃除將作監改直華文閣因舊任六年令赴行在
奏事道除太府少卿旣至面對三劄首言委任之失
次言謀謨之誤次言當上法祖宗使善類常合言路
常通御劄劉克莊文名久著史學尤精可特賜同進
士出身除秘書少監令與尤焞同任史事次日兼權
國史院編脩實錄院檢討官又三日兼崇政殿說書
轉對言今日之深憂莫如國本未建援引甚詳暫兼

中書舍人史嵩之服闋御筆除職予祠令克莊行詞
克莊奏嵩之有無父之罪四無君之罪七舊相致仕
合有詰詞今臣行嵩之之詞未知爲褒爲貶論奏不
已爲殿中侍御史章琰劾能七年除直龍圖閣主管
明道宮八年除宗正少卿尋依舊職知漳州就除秘
閣脩撰福建提刑以便養甫及月丁內艱方禪除秘
書監有旨趣行旣至兼太常少卿直學士院兼崇政
殿說書史館同脩撰時事多內出克莊言祖宗盛時
內降絕少今中外除授不由大臣啓擬求者予者奉
行者習以爲常臣竊惜之言忤當國尋除起居舍人

復兼侍講進言愈切力奏不草史宇之荅詔十二年
除右文殿脩撰知建寧府改福建轉運副使以鄭發
疏褫職寢新命提舉明道宮景定元年賈似道還朝
歷遷權工部尚書兼侍講以年迫堅乞納祿除寶章
閣學士知建寧府五年除煥章閣學士守本官致仕
度宗咸淳四年特除龍圖閣學士仍舊致仕明年年
八十三卒謚文定克莊學問充積尤長吏事而爲文
名所勝其德秀嘗以學貫古今文追騷雅廬之守宜
舉職不負所知晚年爲賈似道一出君子惜焉所著
後村居士前後續新四集行於世

劉朔字復之紹興三十年試禮部第一廷試甲科調
温州司戶叅軍與反俱不輕許可學者輻輳其門屬
歲饑疫火焚千餘家守袁孚以朔董其事饑者與粟
病者與劑寒濱死者與褚被爲坊二命僧主醫療日
一至以藥囊粥釜自隨所活數萬人牧道傍棄兒募
乳飼及聽無子者擇取孝宗初立與林光朝同召對
曰陛下何不納憤激敢言之士而聽訐直難堪之
言因以自考察成敗得失且及曾覲龍大淵罪狀改
宣議郎知福清縣以至誠待民聽訟無留滯市食掛
錢於門民當其物持錢去會病作請祠歸再召入對

於是虞允文贊孝宗恢復士多嚮之朔極諫以爲宜
選兵將廣儲峙責成於端重堪事者從容以待其變
不可憑虛蹈空過爲指料決天下於一擲孝宗竦然
免試除秘書省正字以疾丐外除福建安撫司叅議
官行至信安傳舍卒朔與其兄夙皆爲時望所推夙
性挺特不以色假人朔則濟以和易至於輕祿位而
重出處厚名義而薄勢利盡言於朝盡心於官飭廉
隅公是非殆不相讓云朔二子起晦字建翁擢淳熙
五年第知貴溪縣召試秘書省正字兼益王府教授
懃有時望識者謂其材行不忝於其父而言官指爲

偽學劾罷之起世擢慶元二年第

韓出公
述等書

起世之子希仁嘉定四年進士因郊有雷雨雹之異
應詔謂付授非材處置失當輕動干戈憂起蕭牆上
誤國家下誤蒼生天威警戒抑在是歟且據七事以
獻於人才尤致意焉又曰論事之臣惟知攻上躬任
事之臣惟知舉權要所言皆磨拂貴近時論壯之在
仕途六十年進爲之日少閑散之時多所薦士如徐
鹿卿皮龍榮輩多貴達而希仁乃屢以謗退官中大
夫平生每遇遷擢必有論建身雖屏處猶上箴闕失
惓惓忠愛畝不忘君云

出備
志

陳士楚字英仲少篤志問學長從林艾軒游乾道八年登進士第調臨江戶曹攝新喻縣政大治改秩調候官縣丞相周必大薦之以國子監簿召對孝宗賢其誠實十六年差樞密院編脩官紹熙初兼司封郎除宗正丞兼嘉王府直講一日百官已趣班雪大作宰相索表稱賀士楚援筆立就朝士皆稱嘆青宮聞經筵士楚講周書無逸知稼穡之艱難乃逸一章其說曰百穀麗于土茲萌旣敷方有實三農力于田莠草旣除方有秋以喻小人有妨君子之意壽皇傳諭曰陳直講說書議論精詳理致深奧誠得師儒之道

賜以金樽玉甌金錢歷軍器少監提舉江南東路茶
鹽公事歲儉民饑不憚巡訪全活者衆再除侍右郎
右史退葺御書閣扁陽春堂楫壺樓觀稼亭皆宸筆
揮洒慶元改元除侍講四月以疾卒賜儀甚厚林希
逸守莆祠艾軒綱山樂軒于城山後人以士楚侑享

云

雜出何
志等書

黃芻字季野少從艾軒學志行高古同遊士自劉夙
劉朔林亦之而下皆推讓焉一第而夭僅止懷安縣
丞

卓先字進之少從艾軒游年十五拔鄉解屢試南宮

不利紹興四年年四十以特科調龍溪主簿歲旱疫
施藥多所全活遷永慶軍節度推官郡倚以治爲建
寧軍節度推官歲亢旱松溪政和建陽浦城四邑仰
食下流官米府禁米舟出城先爭曰四邑非建民耶
守史彌堅以是重之後以倦遊歸里卒先平生居官
廉靖言論據經是古與人寡合陳必郭煥許與特甚
而傳伯成尤器重之

出備志

林劉陳黃卓傳第二十七

鄭厚鄭樵傳第二十八

鄭厚字景韋興化縣人唐右散騎常侍兼侍御史續
之裔四歲讀書一覽千言輒成誦七八歲通解經旨
稍長下筆成章援引古今議論時舍法行士子惟通
一經厚獨兼之自太學歸講學薊林從游者衆與從
弟樵倡物理之學宇文虛中一見異之嘗貽以書曰
士弊於科舉久矣安知亦有淵源深渺不爲俗學所漬
如二公者乎紹興五年再舉禮部奏賦第一廷對六
千言指陳無隱高宗聞厚姓名有詔特循兩資與陞
擢差遣授左從事郎泉州觀察推官嘗上奏三事曰

國勢治體兵備紹興八年以趙鼎薦召對因言御將
固本攬權之方高宗嘉納會鼎去國詔任滿日改令
入官明年至泉適鼎爲泉守事皆屬厚尋以郡吏決
死獄誤以甲爲乙與守佐皆連坐解去踰年除廣東
路茶鹽司幹辦公事歷昭信節度推官與守將討平
齊述之亂掩骼埋胔賑給流離郡賴以安改左承事
郎知湘鄉縣縣號繁劇厚臨之以公吏民畏愛郡守
部使者皆待以賓友與之談論經理未及代卒厚器
局宏遠學問該博尤善屬文以左氏爲法嘗著存古
易去彖象文言大傳以爲皆後之學易者所作又嘗

著書號藝圃折衷指湯武放代爲亂臣賊子之首論
伊尹放太甲周公相成王攝政爲啓後世篡逆之禍
詆孟子誦仁義而賣仁義爲儀秦之雄其他立論與
古聖賢相悖者尤多當時蓋嘗坐是爲臺官所劾十
年不調云

雜出事實等書

鄭樵字漁仲厚之從弟也父國器太學生嘗鬻已田
築蘇洋陂人食其德没于姑蘇時樵年拾陸盛夏徒
步護喪歸葬自是謝絕人事結廬越王山下閉門誦
習旣又築草堂夾滌山以居久之乃遊名山大川搜
奇訪古遇藏書家必借留讀盡乃歸晝理簡編夜觀

星象飲食寒暑俱忘專以討論著述不爲文章自負
不下劉向揚雄一時名人若李綱趙鼎張浚皆器重之
初爲小學經旨禮樂文字天文地理昆蟲草木方書
之學皆有論辨紹興十九年上之詔歲祕府復還草
堂益屬所學從者二百餘人尋喪母哀毀廬墓三年
部使者舉孝廉者三舉遺逸者二皆不就紹興二十七
年以侍講王綸賀允中薦應召明年上殿奏言臣處
山林三十餘年脩書五十種皆已成之書其未成者
臣取歷代之籍始自三皇終于五季通脩爲一書名
曰通志參用馬遷之體而異馬遷之法謹摭其要覽

十二篇名曰脩史大例帝曰聞卿名久矣敷陳古學
自成一家何相見之晚耶授右迪功郎禮兵部架閣
力乞還山自監南岳廟還家論著閔四年通志成紀
傳世家載記用舊而以年表爲譜以志爲畧十五畧
不涉漢唐諸儒議論五畧雖本前人之典亦非諸史
舊文蓋平生所考論者弘綱機要皆聚於此乃詣闕
請對上之會車駕幸建康戒嚴樵未得見以爲樞密
院編脩官尋兼權檢詳諸房文字時虜勢張甚樵言
歲星分在宋金主將自斃後果然明年春高宗至自
建康命以通志繳進會病卒年五十九學者稱夾漈

先生樵於學無所不通其論書則先按伏生孔壁之
舊與漢儒所傳唐世所易以辨其古今文字之所以
訛傳春秋則首考三家之文叅以同異而斷其簡策
傳寫於口耳授受之互有誤說詩則辨大小序之文
別風雅頌之音正二南王化之地明鳥獸草木之實
類皆信而有證居鄉累歲不一詣守令閭人束脩一
無所受筆劄雖詔從官給未嘗取也見人寸善推譽
如不及有來質問者苟可告語為之傾倒數於當路
薦林光朝林彖增築蘇陂以紹先志作永實橋過來
菴苟一有利於人必力為之詩文之屬有谿西集五

十卷子翁歸及事述等書

鄭厚鄭樵傳第二十八

鄭黃方黃傳第二十九

鄭可學字子上號持齋露之後少孤貧由鄉薦兩浙漕試再貢禮部皆不利道武夷見朱文公從學自以稟性卞急於懲忿工夫尤久之最稱得文公精要文公守臨漳賓禮可學以教其子弟晚年刪定大學一編曰此書欲付得人惟子上足以當之凡四方學者疑問多使可學是正而士友之南者必見可學而後行當代聞人如曾逢曾逮與爲忘年交呂祖儉李孟傳廖德明皆敬禮之前後三奉大對嘉定四年始授忠州文學是歲廖德明帥廣招致郡齋湖

南漕使曾槃檄攝衡陽戶曹道卒所著有春秋博議
出事迹
等書

鄭耕老字穀叔父安正少負才學篤志訓諸子嘗築
書堂率閭里子弟講學一時名士多從之游耕老登
紹興十五年進士第主懷安縣簿母喪調温州法曹
改明州教授四明自文真焚蕩之後學陋教弛耕老
更營學區爲講說科舉之外者侍從多以通經術薦
召見奏言太祖嘗問趙普曰天下何物最大曰道理
最大知道理爲大則必不以私意而失公中考宗悅
親擢國子監主簿添差福建安撫司機宜文字滿秩

徑歸南陂素履聲律浮靡讀詩易庸範語益味其深
微皆有訓釋榮利澹如也兄箕老特奏名出補賜此
鄭獻翁字帝臣伯王之裔也少從鄉先生黃績學嘗
與朋儕私自較藝一日作三十餘論衆皆驚服第咸
淳元年進士終漳州推官至元改物故官例起叙用
而獻翁以老病免爲人豁達表裏洞然偉容貌眉目
踈秀鬚長至腹見者拭目方是時前輩舊德多已淪
謝後生頗習胡俗獻翁獨以所學傳於人故家子弟
猶賴之不墜其業顧長卿兄弟皆出其門後與黃績
之子仲元及其徒林應成輩倡仰止之學續東湖之

祀鬻田數十畝爲春秋釋奠之費年七十餘卒

出原王正近記

黃士毅字子洪自莆徙居吳不忘故鄉因號壺山幼知嗜學爲向上事業方慶元詆排道學士毅徒步趨閩師朱文公命日觀一書夜叩所見文公嘗告以靜坐勿雜喚醒勿昏居數月授以大學章句終其身從事於斯著述甚富類註儀禮撰次文公書說及文集又因語錄成書分門序次爲語類嘗言孔孟之道至周程而復明至朱子而大明識者以爲知言出通志方大壯字履之廷範之裔少穎悟操筆成章艾軒二劉咸推重之年長不事場屋專心求道朱文公至莆

舉所學就正焉得其親傳之懿日與同志講明自號履齋文公爲書其扁大壯性孝執父喪三年不出戶臨沒勉子姪養其母戒治喪無用浮屠冠衣束帶而沒學者稱履齋先生子大東字東叔弱冠文藝絕流輩年五十始與二子消孫澄孫同拔漕解明年第進士乙科調泉州永春縣主簿卒

雖出等書

澄孫字蒙仲以字行少能文落筆若宿構者淳祐七年廷對萬言終始欲聚君子以續國氣脉明公論以強國精神又請立涪陵後鋼秦檜子孫竄史嵩之以謝天下擢甲科爲邵武軍學教授賓禮耆宿作成俊

秀會學廩贏錢及校官例券置貢士蒞秩滿監激賞
所酒庫以基去辟淮西制置司幹官入爲國子監庫
官校藝南宮坐商論去取不能下氣去添差通判南
劍州改泉州辟淮西制置司叅議官適虜渡江治法
征謀悉咨之而行虜退知邵武軍邵武歲三易守蒙
仲樽節以繼乏絕拊柔獷俗表倡儒行請立樵川書
院以廣教養郡最聞增一秩尋以秘書丞召卒蒙仲
初年挾才乘氣旣乃務爲謙和一時諸賢皆折節與
之友方大琮王邁劉克莊尤愛厚之始以文字見知
賈似道及似道相蒙仲獨求外補自效終其身子公

權字立道以遺澤補將仕郎推咸淳元年第先是蒙
仲臨終以世業勉公權果以詞賦魁福建漕試歷廣
州教授太常寺主簿以歸景炎間興化再被元兵甫
罷屠戮故官遽變衣冠求見元帥唆都公權獨以大
義責之唆都反降勢禮遇然公權竟不仕卒平生著
述甚富時稱石巖先生

述事

方符字子約大壯兄子少授學於叔父以鄉試上春
官道考亭拜朱文公於精舍留語累夕爲作字說第
慶元己未進士文公以書賀大壯云符清苦自勵窮
達得喪惟命之安歷潤衢二州教授知瀏陽縣通判

徽州未上卒

出備

黃補字季全號吾軒洎之後父端第紹興十二年進士歷惠州教授終安溪縣令補侍宦惠州時未嘉陳鵬飛適謫居于此因得師友之其爲學專用心於內而世間利達不少動其心已而以其學教授于鄉及門者數百人特林光朝講學城南補在城東幾與齊名乾道八年登特科授高州文學調高要縣尉卒有九經解等書

出八閩

黃績字德遠洎之裔兄績寶慶二年進士績少凝重

老中年還里聞陳宓潘柄從黃幹得朱子之學遂師
事之與同志十餘人集陳氏仰止堂旬日一講宓柄
卒績與同門友築東湖書堂於望仙門外東畔請田
于官春秋祀焉讀約聚講如二師在時向之同門友
又皆相與就正於績故績雖布衣然爲鄉先生三十
年門人著錄牒以數十百計郡守佐博士皆加敬禮
先是郡守楊棟即學宮建尊德堂以處劉彌邵暨彌
邵卒後虛其堂無敢居之者至是邦人相率推績繼
之涵江書院始賜額又以績無其山長然皆非其好
也晚聞趙以夫作易通與之上下其論以夫謂爲益友

績兄弟皆與劉克莊善克莊目績曰愛友績曰畏友
績以獨不懼名齊克莊爲記所著有四書遺說等書
藏於家平生不喜作韻語時有感興亦自得風人之
趣云績前卒有星隕書樓之西及卒又有雷雨之變
君子謂績匹夫而垂死之際天變若是殆異於衆人

耶述出事

仲元字善甫號四如績之子也少刻志讀瀛洛關閩
及父績所傳潘陳二師之書抄拾唐宋名人之文凡
二百四十二家文學爲時推重第咸淳進士前後五
除官最後除國子監簿皆不赴宋亡後更其名曰淵

字天叟又併改四如之號而以韻鄉聲翁彥安為稱
怡然窮居深入理奧學文必檀弓穀梁學詩必三百
篇陶韋柳州推廣先志凡其口講心授莫非仰止傳
習之懿而尤嚴東湖之祠晨必謁朔望必參二仲釋
菜暇則課守者洒掃風雨則視其蓋障雖老不少廢
年八十二卒仲元說經間與先賢異同其為文亦類
艱深至於奇古處殆不可句云有四書講稿等書藏
於家

出事迹

鄭黃方黃傳第二十九

張林余林鄭謝傳第三十

張弼字舜元僊遊縣人性恬淡好學尤刻意於易以爲繫辭者聖人所以翼易始意其大例當在於此乃置諸家之傳註獨執經誦之凡三十年忽有所悟久而益信乃以所得大例幾百條推明爲書根象數原義理得與民同患之實用雖與前此談易者異同而用於爻象之辭一字皆有所本出黃裳是以上極道德性命之理下及昆蟲草木之微禮樂典章法度可指吉凶悔吝動靜先知有漢晉易家所不到者出黃裳紹聖初丞相章惇以其名聞并上所著書賜號葆光

處士三年朝奉郎林伸等百五十三人列薦于守帥
部使者轉以上奏勅授福建司戶叅軍充泉州州學
教授彌鬱鬱然若有不樂者未赴官而卒

出書述
等書

林彖字商卿幼孤隨母鞠於外祖陳次升家以故得
盡讀六經百氏之書多聞元祐名臣出處大節與宋
累朝典故後遷居真州又得事劉安世任伯雨陳瓘
諸公而與任申先象先兄弟爲忘年友所得益加於
前紹興初嘗爲簽樞徐俯禮致而終不肯受其薦奉
母歸閩救水盡歡母沒終喪不謀婚娶曰吾有弟不
至絕先人世不問家事曰吾以付二弟若復以家事

相聞白安能遂吾志哉寓跡龍華寺法華菴榜所居
軒曰聽雨小園曰意足日怡然於其間縣官希見其
氣味或可語者時一見之非其所好扣門不納也處
之四十年如一日平生身不接俗人口不談世務足
不踐舉場隆興元年春監司帥臣列薦有旨召赴行
在力以疾辭其秋丞相陳康伯樞密黃祖舜再取旨
令監司郡守敦促之復引疾不就於是陳孝則林孝
澤皆泉莆偉人適以憲漕會閩中相繼率三數百人
以彖名聞叅政周葵以重望鎮泉山即以孝則孝澤
之狀上孝宗爲再促召亦不赴乾道四年詔特與進

士出身添差興化軍教授未一考而卒年七十自號

萍齋

出書述

林肅字恭之淳熙三年登進士第少有文名從游艾軒之門試教官科中首選調臨安府學教授卒同邑有傳蒙者字景初少亦從艾軒學工詞賦兼五經孝宗朝嘗著萬言書上之退而講學龍池以淑後進自號與軒後以子矩恩封從政郎

余元一字景思淳熙五年以詩學魁南宮登進士乙科娶勉齋黃榦之女弟而榦則朱文公壻也因得親炙於文公始見之目以仁義禮智信分作五論及自著

文集為贅文公頗敬愛之嘗有荅余景思書見文公
別集歷官知同安縣號稱清嚴終池州通判同邑有
林德遇者字若時性質頗鈍一日忽發憤鬻產裹糧
走武夷山中拜文公求教令日誦論語集註久之覺
有所開悟發於文辭亦明暢可觀文公卒復往赴葬
家居與貫齋陳沂相友善切磋漸磨卒為鄉名士云

出仙
志

林磻字豈獻嘉定十三年登進士第少負雋聲從游
者衆臞軒王邁嘗師事之官止海陽縣尉同邑林蒙
亨字宿西其學於天文地理諸子百家之書無不該

貫莆泉學者多從之遊而邁尤敬焉兩預鄉書不第
後以子有之恩贈朝請郎出仙溪志

鄭彬新字中實先世自建之浦城遷于僊遊以太學
生登嘉定十六年進士第知晉江縣建問政堂輯論
語繫於政者二十四章書于壁以便省覽又建縣學
文宣王廟闢一堂扁以尊道時真德秀守泉頗敬重
之邑民相與立生祠于紫澤宮尋通判處州監石版
東庫遷國子書庫授都大提管卒遺命治館舍一以
儀禮從事昂新少授業黃幹之門詳增考定
禮書成編名曰禮學舉要亦參黃氏及楊復新先生

又撰禮學從宜一集居家好義有家塾義莊德秀嘗

爲之記

出仙
紹志

謝升賢字景芳少篤志義理之學以太學生祭端平
二年進士第調洽光縣尉會教官闕員守委攝學事
廣州濂泉書堂新成帥漕方大琮檄爲堂長提刑楊
大異又檄爲桐江書院堂長其後大琮大異皆薦于
朝乞充師儒之選官至興寧縣令所著有太極西銘
說易通庸學語孟解大意皆推本朱文公之書嘗曰
欲邇道之所出以究其終則必先三書而後四書欲
窮道之所入而反其始則必先四書而後三書自號

起齋

出仙
溪志

張林余林鄭謝傳第三十

方信孺傳第三十一

方信孺字季若儀七世孫父崧卿擢隆興元年進士知上饒縣以政績聞通判明州秩滿知南安軍律身廉蒞事勤平易得民移知吉州罷米運力勝錢歲萬餘緡減放諸邑月斛錢歲六萬八千緡作六一堂於郡治東北隅祀歐陽文忠公搜遺墨八卷刻石其中除廣西轉運判官改定鹽法奏罷歲解鄂靖錢十一萬緡採訪鹽課利害編爲書十二條上之崧卿自治嚴接人一團和氣平居常以寧人負我無我負人之語戒飭子弟所得祿賜半爲抄書之費家藏書四萬

卷皆手自校讎嘗校正韓昌黎文集又譜其經行次

第爲韓詩編年凡十五卷刻南安郡齋

出何志

信孺

有雋材朱冠能文周必大楊萬里見而異之以父蔭

補番禺縣尉盜劫海賈信孺捕之盜方沙聚分鹵獲

惶駭欲趨舟信孺已使人負盜舟去矣悉縛盜不失

一人韓侂冑舉恢復之謀諸將債軍邊釁不已朝廷

尋悔金人亦厭兵乃遣韓元靚來使而都督府亦再

遣壯士遺敵書然皆莫能得其要領開禧三年近臣

薦信孺可使自蕭山丞召赴都命以使事信孺曰開

釁自我金人設問首謀當何以答之侂冑矍然假朝

奉郎樞密院檢討文字克樞密院參謀官持督帥張
巖書通問于金國元帥府至濠州金帥紇石烈子仁
止于獄中露刃環守之絕其薪水要以五事信孺曰
反俘歸幣可也縛送首謀於古無之稱藩割地則非
臣子所忍言子仁怒曰若不望生還耶信孺曰吾將
命出國門時已寘死生度外矣至汴見金左丞相都
元帥完顏宗浩出就傳舍宗浩使將命者來堅持五
事且謂稱藩割地自有故事信孺曰昔靖康倉卒割
三鎮紹興以太母故暫屈今日願可用爲故事耶此
事不獨小臣不敢言行府亦不敢奏也請面見丞相

決之將命者引而前宗浩方坐幄中陳兵見之云五
事不從兵南下矣信孺辯對不少訕宗浩斥之曰前
日稱兵今日求和何也信孺曰前事興兵復讎為社
稷也今日屈已求和為生靈也宗浩不能詰授以報
書曰和與戰候再至決之信孺還詔侍從兩省臺諫
官議所以復命衆議還俘獲罪首謀增歲幣五萬遣
信孺再往時吳曦已誅金人氣頗索然猶執初議信
孺曰本朝謂增幣已為卑屈況名分地界哉且以曲
直校之本朝興兵在去年四月若貶書誘吳曦則去
年三月也其曲固有在矣如以強弱言之若得除濠

我亦得泗漣水若誇胥浦橋之勝我亦有鳳凰山之
捷若謂我不能下宿壽若圍廬和楚果能下乎五事
已從其三而猶不我聽不過再加兵耳金人見信孺
忠懇乃曰割地之議姑寢但稱藩不從當以叔為伯
歲幣外別犒師可也信孺固執不許宗浩計窮遂密
與定約復命再差克通謝國信所參謀官奉國書誓
草及許通謝百萬緡至汴宗浩盡變前說怒信孺不
曲折建白遽以誓書來有誅戮禁錮語信孺不為動
將命曰此事非犒軍錢可了別出事目信孺曰歲幣
不可再增故代以通謝錢今得此求彼吾有隕首而

已將命曰不爾丞相欲留公信孺曰留於此死辱命亦死不若死於此會蜀兵取散關金人益疑信孺還言敵所欲者五事割兩淮一增歲幣二犒軍三索歸正等人四其五不敢言侂冑再三問至厲聲詰之信孺徐曰欲得太師頭耳侂冑大怒奪三秩臨江軍居住信孺自春至秋使金三往返以口舌折強敵金人計屈情見然憤其不屈議用弗就已而王柟出使定和議增幣函首皆前信孺所持不可者柟白廟堂信孺辨折敵首於強懷未易告語之時信孺當其難柟當其易柟每見金人必問信孺安在公論所推雖敵

人不能掩也乃詔信孺自便杜尋通判肇慶府復奉議郎峒寇竊發被旨同廖德明措置收捕就命知韶州至郡即封崇張九齡余靖墓擒赤水峒賊首戮之轉承議郎知澧州首竄不檢士號十虎者飾濂溪祠作太史闕表元次山遺跡俄提點廣東刑獄奏縱屬郡久不決之訟數百人前政所發摘竄繫守令考罪虛實多奏釋之轉朝奉郎轉運判官遂踐其父世職深知鹽筴利害操幹裁擢自出新智以潛計之餘新學宮增士廩創類試院又蠲諸郡鹽逋二十六萬緡歲舉必先孤寒小校裨將有不幸者必歸其

喪與孥遷淮東轉運判官兼提刑知真州即北山置
水築石堤袤二十里人莫知其所為後金人薄儀真
守將決水墮以退敵城乃獲金山東初內附信孺言
豪傑不可以虛名駕馭武夫不可以弱勢彈壓宜選
威望重臣將精兵數萬開幕山東以主制客以重馭
輕則可以包山東固江北而兩河在吾目中矣坐其
降三秩再奉祠稍復官信孺性豪爽揮金如糞土所
至賓客滿其後車使北時年總三十既齟齬歸營居
室巉竇自放於詩酒後貲用竭賓客益落信孺尋亦

死矣

雜出事述
及本傳

方信孺傳第三十一

陳居仁宋棐林枏傳第三十二

陳居仁字安行父太府少卿膏娶明州汪氏女因家焉膏初為汾州教授佐守臣張克猷捍金人後知惠州單騎造曾衮壘壁曉降之鄞僧王法恩謀逆事覺或請屠城膏方為御史力論多殺非聖世事脅從者悉寬宥居仁紹興二十一年舉進士秦檜與膏有故有勸以一見可得美官居仁曰是有命焉終不自通詔脩高宗聖政妙選寮屬與范成大並充檢討官淮南交兵魏杞以宗政少卿使金辟居仁幕下時和戰未決金兵駐淮北人情恟懼突騎大至彎弓夾道居

仁上馬猶從容舉酒屬杞天寒且醕此觴觀者壯之
乃諭金人開道入李成禮減歲幣而還及杞秉國柄
居仁忍貧需遠次未嘗求進虞允文欲引以為用不
就允文欲與論兵謝不能退而貽書謂有定力乃可
立事若徒為大言終必無成幸成亦旋敗允文為之
色動嘗轉對言立國須定規模陛下非無可致之資
而規模未立孝宗初頗不懌曰朕未嘗不立規模居
仁奏陛下銳意恢復繼乃通和和戰守三者迄今未
定孰為規模耶允文曰此正前日定力之論某今益
知此言之當也進秘書丞入對論文武並用長久之

術陛下獎進武臣深得持平救偏之道然未必得智
謀勇畧之士或多便佞輕躁之徒將復有偏勝之患
帝嘉納權禮部郎官嘗言臺閣宜多用明習典故之
士帝問其人居仁以李壽真濟對甫數日召壽居仁
力請外乃知徽州帝令陞辭慰諭遣之至郡告以天
子節經費以惠儉瘠不能推廣聖德吏則有罪乃招
三衙軍植二表于庭有輸納中度而遭抑退者抱所
輸立表下親視之人無留滯吏不能措手輸稅者恒
畏羸以歸鄰州有訟多詣臺省乞決於居仁秩滿邦
人挽留由間道始得去入對帝舉新安之政獎之請

編類隆興以來寬恤詔令有曰法久則易玩事久則易怠惟申加戒飭有以儆其觀聽則千萬年猶一日帝曰名言也又言歸正忠順過於優渥而遇戰士反輕此曹出萬死策勲今老矣添差已罷廩稍半給至丐于市軍士解體乞加優恤以全終始念功之意堅後生圖報之心帝覽之嘉歎會駕大閱白石即命再添差兩任衣糧全給三軍為之呼舞留為戶部右曹郎官命未下朝方推會要賞帝曰陳居仁治行為天下第一可因是并賞之特轉朝議大夫會樞屬闕員方進擬帝曰豈有人才如陳居仁而可久為郎乎即

授樞密院檢討文字尋爲右司遷左司又遷檢正中
書門下省諸房公事歷兼左藏諸庫居仁親視案牘
嘗謂有罪幸免則寃者何告誣枉者七人皆當叙復
執政難之居仁退疏其寃狀上之帝曰居仁精審尚
復何疑詔以早求言居仁乞命公卿務行寬大假吏
部尚書使金還無權中書舍人泛恩濫賞封繳無所
避因言恩惠不及小民名爲寬逋負實以惠頑民耳
名爲赦有罪實以惠奸民耳願盡放天下五等戶身
丁四等戶一半從之安定王子彤乞封妾爲夫人居
仁繳奏帝喜迎謂有補風教又論君人之道貴在執

要今陛下親細故而忽遠猷事末節而忘大體願舉
綱要以御臣下省思慮以順精神詰旦令清中書之
務權直學士院帝曰內外制向委數人今陳居仁一
人當之不見其難乞詔大臣博議絕浮費汰冗兵計
當省之數定蠲除之目此富民之要術也以集英殿
脩撰知鄂州築長隄并江新安樂寮以養貧病之民
撥圃田歸之進煥章閣待制移建寧府歲饑出儲粟
平其價弛逋負以巨萬計代輸畸零蘭稅有因告糴
殺人者會赦免居仁曰此亂民也釋之將覆出爲惡
遂誅之觀察推官柳某貧死不克歸二子行丐于道

聞而憐之予之衣食買田以養之擇師以教之鎮江
大旱又移居仁守鎮江請以緡錢十四萬給兵食不
報爲書以義撼丞相然後許發時密往覘之間遣羅
運於荆楚商人商人曰是陳待制耶爭以粟就羅居
仁區畫有方所存活數萬計因饑民治古海鮮界港
爲石碇丹徒境上蓄泄以時以通漕運治江陰姦僧
加寶文閣待制知福州入境有饑民囑聚部分迂兵
遮擊之首惡計窮自經死治宗室之暴橫申燕毒之
僭禁再進華文閣直學士提舉太平興國宮卒贈金
紫光祿大夫居仁風度凝遠處已應物一以誠信臨

事毅然有守所至號稱循吏皆立祠祀之有議奏制
藁詩文行世子卓字立道紹熙元年進士其後知江
州移寧國府丞相吳潛以故欲其一見卓謝不往潛
益器之在詞掖草虢叛臣李全爵詔書至淮人益自
厲又草太廟災罪已詔京師爲之感動端平初簽書
樞密院事未幾丐祠以資政殿學士還里平生不營
產業以贖書所酬金築世綸堂間居十有六年卒年
八十六葬事不能具潛聞之貽書制置使以助其孫
定孫力請謚于朝廼謚清敏

出宋史本傳

宋棐字材成後埭人政和五年登第建炎初知餘干

縣盜張遇方蹂躪旁郡驅掠旬餘千棐率民臨水植
幟聲鼓若將出迎敵者盜疑引去徙知邵武縣鄰郡
寇范汝為毛涅龍始出就招所過需丁壯負擔殘虐
甚棐先寇令民遁去寇旣剽掠無所獲群譟持兵乘
夜入卧內棐諭之去不為調一夫民得全活去邑二
十年有語及輒涕下者紹興中入為金部員外郎扈
從幸建康時方用張浚韓世忠圖恢復棐請詔中外
臣僚採訪勇力權畧之士不時舉薦以備採擇從之
因留總大軍錢糧適有司窘用度兩軍號百萬棐為
調度兵食不擾而辦秦檜專政頗忌棐棐奉祀者再

及起知通州以治最聞用薦累遷主管淮東安撫公
事召為太府少卿充金國迓送正旦使還錄其語以
聞上嘉其有專對才遷太常少卿兼史館直學士院
顯仁太后崩斟酌典故一出棐手遂權禮部侍郎會朝
廷謀帥以棐為集英殿脩撰知紹興府兼浙東安撫
使明年虜入淮甸聲搖近輔或欲調兵積粟嚴備非
常棐鎮以無事一方晏然力祈去除敷文閣待制提
舉江州太平興國宮凡五年上章納祿詔以通議大
夫致仕卒贈少師弟椿紹興五年別試第一衢州教
授子煜歷知循賓惠三州皆有惠政官終朝議大夫

直徽猷閣魯孫詡以祖蔭入官歷知程鄉歸善二縣
遷通判汀州史彌遠當國罷歸端平初起通判廣州
摧鋒軍士作亂帥臣魯治鳳棄城遁詡力備禦直以
聞有旨命崔與之領州事詡佐之賊奔他境與之薦
詡綿歷已深廉介有守擢知循州進直煥章閣知潮
州未上卒

出方志及
事迹等書

藻字去華某之從子也弱冠兩貢辟雍舍法改復
與從父椿預計偕紹興初同試禮部時號二宋尋進
中興十君論高宗語執政云藻所進篇篇可採遂以
布衣召見占對如響高宗悅欲爵以京秩試編脩官

政府以上書不先白阻之注廬陵尉登八年進士改邵武軍教授添差福建轉運司幹官藻以汀虔循梅山賊嘯聚進銷寇六策被旨應辦大軍錢糧兵食不乏詣闕上書指陳時政牴牾故相累年不調久乃補英州學官改秩知益陽縣連丁家難進時議二十篇除江南西路轉運司主管文字會金亮淪盟朝廷分遣屯戍以藻充湖北京西招討司機宜與主帥分畫形勢西屯襄陽則觀登州東屯德安則向蔡州中駐郢州則上可赴唐城東西可援蔡鄧主帥如其請及虜犯信陽果一劔而退不復窺漢上乃悉引兵瞰瓜

州藻言於主帥奏乞盡發戰艦防江面虜既殺其以
還朝廷遣五招討使分路追襲藻至楚泗塞伺虜
師有律恐我軍昧利深入為所掩乃馬上占奏土之
高宗即命班師擢藻知江陰軍金兵繼擾淮甸心民
日夕渡江藻勞來安集至者如歸督府分屯義兵
五千人藻為營室廬峙糗糧金兵既退諸州米價翔
湧疫癘盛行獨江陰無恙父老守闕上書頌治狀孝
宗即位除提舉浙東常平茶鹽公事陞辭慰勞甚悉
至官未期重造明越梁湖廢堰更創三衢義倉罷脩
胥六百六十九人永嘉有風濤之變藻被旨賑恤躬

行阡陌瘞死骸七千餘發粟寬租捐竹木之稅便民
興造又奏以絕戶之產分恤孤惻勞績上聞四膺召
對所敷陳無不開納坐彈劾温州守臣為權貴所擠
力丐休致得祠而歸藻自布衣寤主以忠鯁自奮
毅寡合其在家雖妻子不見笑容居官以身臨民未
嘗少自恕後除守漳州又除提舉江東皆不拜結廬
囊山先塋之側以讀書自娛比沒告諸子曰余平生
操履無負所學今老矣復何恨但易觥未成耳年八

十二卒贈太中大夫

出事迹
等書

鈞字茂洪藻之孫也幼警敏精厲長博涉經史過

眼不忘登紹熙四年進士調晉江尉瀕海多盜鈞捕有方以能賞改承務郎授荆門軍簽判移廣德軍討寇征賦源委告部使者裁其額知南海縣考核精明丁口登耗升降必以實民不能賕吏為奸教育秀艾勸鋤奸強政聲奕起通判饒州楮幣更列郡過於奉行告訐滋熾鈞抗疏極言展收換之期寢編籍之科召為太府寺主簿尋知嚴州首請乞蠲淳安經總制錢五千緡次第蠲損他邑無名征歛起義役買朕田以贍其用課最累遷右曹郎官改左曹總領淮東軍馬錢糧寇入光州鈞策虜無能為當下詔進討重賞

以招降附清野以待饑勞分兵迎敵東擊西應毋專
守地分人自為謀又言宜藉江淮之高工罷溫福之
防托別造防江輕艦數百艘上下采石瓜洲間以備
策應多見采納就遷司農少卿後以朝奉大夫直敷
文閣再知泉州泉舊隨歲進數納台信建昌邵武上
供銀大為民病鈞手疏乞泉與四州從初賦從之初
局講荒政乞借撥椿積及通放平江糴舟小商貸本
巨家勸分而米大集斟酌便宜分等糶濟幼薦孔疾
與醫道恙者續粥藥所活萬計除海苔蠲房葵葉鹽
鮓等稅蠲閣諸色逋賦捐俸代輸畸零之戶民盡像

祀之以父喪罷歸服闋直顯謨閣經略廣東進秘閣
修撰急民隱盡下情以蜚族悍戾刺爲權卒成壽昌
南人善水旣除境內之盜又免番更之勞一舉而三
得會虜擾淮甸朝廷以鈞暢曉邊事趣還未行卒年
五十八鈞性孝友其學問以行已爲本濟時爲用三
國六朝得失成敗之數歷歷如身履凡江淮攻守大
勢援古訂今具有本末以實學圖實政君子惜其所
施未竟其蘊云子應先朝請郎通判泉州

山事述
等書

林枏字子方孝子攢九世孫也伯父孝淵崇寧五年
進士歷秦州南劍教授王黼當國以同年屢遣堂吏

屈一見曰要職可得也孝淵曰有命竟由選格歷建
州通判改泉州時福建二州殺其守將泉卒亦習亂
屢犯郡守而信孝淵一言不敢暴提舉舶事邵邦建
以其材術疏通吏事詳練有綏靖兵民之功特薦之
嘗按收舶貨歸吏循例取一匣腦以納孝淵斥反舶
庫父孝澤宣和六年進士歷知南康軍提舉廣東市
舶有番姬蒲持珍異以賂禁掖爲子求官中人勸之
孝澤曰他日三佛齊以非時請入貢明主猶謝遣之
今以一賈婦使朝廷廢二百年互市成法可乎上書
力爭固持不遣就除轉運判官知漳州清介特甚至

不用官燭於私室遷提點廣東刑獄力辭除直秘閣
與祠朝廷每選守重藩名郡必及孝澤以老不欲勞
之年八十餘卒枅擢紹興二十一年第召對首言持
祿固寵之臣似無過而緩急無所用骨鯁鯁直之臣
似無用而大節不能及又言兵強財豐未足恃所恃
者得人心得人心者脩德而已翼日孝宗語宰執曰
林枅儘忠實除秘書省正字與脩中興會要遷校書
郎求補外知信州陞辭論清議者忠臣節士之所慕
而權倖說諂之所憚也柰何惡之又言祖宗之法不
用武人爲大帥必用文人爲經略以總制之今內郡

之守百里之宰皆用武臣參之則方面專制又將付
之何異唐之季世乎析至郡裁驕兵以法斥公帑代
輸物力錢民德之提舉廣東常平茶鹽就爲轉運判
官移使江西發漕司緡錢三萬六千助諸縣歲計陸
豫章疫死者浮匿三千爲塚六百九骨函五百餘窆
其士大夫貧不能自窆者三百匿會泉州缺守臣孝
宗於班簿中求一風力之士補之遂以校柝泉爲會
府訟牒盈庭剖決無留舉行荒政條其病民者剗之
立三賢堂祀姜丞相秦隱君歐陽四門召除直秘閣
福建路轉運判官申詒汀州無額經總制錢等第減

放寧化秦寧兩縣苗米論漳州于斗司收諸絕產爲
除豁諸縣稅色有旨兼領泉州光宗即位召拜吏部
郎中未幾除直煥章閣江東轉運副使奏鑄廣德建
平和買多取之額改知慶元府直徽猷閣知福州甃
城四千丈卒於福州枿官雖不登禁從而持節分閭
所至有聲剛方廉介濟以仁慈吏畏民懷爲當世所
稱道云

許出何
志等書

陳居仁宋裴林枿傳第三十二

方吳李丁林傳第三十三

方大琮字德潤慎從七世孫也祖萬擢紹興三十年進士大琮以詞賦爲開禧元年省試第三人授南劍州學教授首封羅仲素墓爲江西轉運司叅議官決獄平允改知將樂縣式楊時廬祀八賢于學丁外艱服除知永福縣值兵饑守隘立柵禁港發廩無虛日時延名士講論文義丁內艱起復累遷太府寺丞蘇民競園田久不決張椿年爲王府掾佃堂帖下所給據大琮曰椿年直欲奪百姓餼盤耳惡知愛國愛王府哉持不可歷秘書郎著作郎除右正言首疏曰雪

川之事向也天地宗祖猶察陛下之不得已今威福
自已出矣而元年御筆有曰立嗣一事難以輕議二
年御筆有曰衛王功茂深欲保持其家一則如待深
讐一則如撫愛子又曰秦王子孫蕃盛今麥餘無主
檜死勒燬致仕今班橐賜第又曰通天地間一氣耳
二相不咸諸閭不協叛卒之變毀旅之闕皆靈氣之
流注激射也誠能宣明洞達此歟不留將具精誠感
召此鑒自弭矣別疏言故王之寃不雪他日所屬意
者皆可保乎權奸之罪不討他日豈無貪功者乎因
極論天下大勢適理宗不御殿封上之踰月八對理

宗曰懼卿言官論當體國大琮曰臣所言無非體國
出疏奏之有曰理亂安危自君心始格其非者在大
臣核其源者在諫臣又以女寵侈費爲戒遷起居舍
人直前奏事且曰淮南之封尚稽輪臺之悔不聞陛
下何不自爲其所易然後責群臣以所難兼國史院
編脩官實錄院檢討官奏乞還魏了翁以重朝廷兼
權直舍人院先是有諫言綱常者竄謫相望及理宗
親政大琮敢言復故王爵召用諸老於是言路稍開
殿中侍御史蔣峴惡之疏劾王邁劉克莊等以大琮
爲魁傑請置重辟大琮遂罷去主管紹興府千秋鴻

禧觀壽起於建寧府中寢嘉熙四年除秘閣脩撰福建路轉運判官時歲荒首發常平倉賑糶自鄉郡始上四州委寓士蔡杭措置糶事淳祐元年改集英殿脩撰知廣州廣東經略四年加寶章閣待制并升從六年進直學士因任大琮在廣五年百度具舉以燕司休盡送三學用朱子所定更造冕服爵俎樽豆簋豆簠簋鑄編鐘以足其數取英韶石爲磬行釋奠鄉飲以禮義化人期盡變其俗增捕鋒軍衣錢給潛水軍出戍糧米改創清海軍門樓改知隆興府命下卒謚忠惠大琮外溫而內方嚴平居抑畏言不

出口至立殿陞爭是非可否雖賁育不能奪第大鑪
大輿蚤卒大琮經紀孀幼恩義無盡有奏議外制雜
著若干卷子演孫字景行弱冠與其群從十一人同
拔甲午胄薦調建康府糧料院從王埜辟制置司幕
官以秋苗例入返府爲修倉之助添差通判南劍州
剖決滯獄如流攝邵武軍屬江閩告警外鎮內撫人
情帖然增郡帑舊儲二十倍創學田百餘畝景定更
化除諸司審計當對傷父大琮坐言濟王事老死遠
方乃疏曰舜有有痺之封周公有蔡仲之命陛下之
聖豈愧古人三十年間因循未行者存亡繼絕之一

事耳反覆數百言累遷太府丞請外知建昌軍度宗
即位陞辭爲上言皆關繫新政之大者復申繼絕之
請至郡首尊李曾二先生之學以表厲其風俗革關
社結集新推排圖帳計所復賦入及積鹽酒息得楮
三十五萬以代四邑下戶之輸并補前此預借之數
孿婦張氏倚勢爲一方害亟聞于朝盡籍其產移守
贛州爲張婦擠罷然張卒抵罪演孫歸奉雲臺崇道
祠俄而蕪湖潰師國事不可支演孫雖家居猶運粟
以助京師集民丁以固鄉邦之守禦即家除工部郎
官廣王襲位福州召除軍器監司農少卿進大司農

演孫權宜措置以輸危急用是病日亟景炎元年九月卒年六十四演孫律身蒞官名能守家法侍父大琮跬步不離大琮鎮廣命演孫入京銓注既發大琮卒演孫走回扶匱悲號哀動行路至於置義倉建義學爲時所重云

出名公事述

吳叔告字君謀水南人曾祖翊成忠郎建州都作院使父元度累贈中散大夫叔告與兄伯脩同貢于鄉端平二年理宗始親政策士于廷叔告以發強密察爲言理宗覽而異之擢爲第一簽書威武軍節度判官廳公事累遷秘書郎輪對首言今虜冰合未來交

口談清野之效裸享偶霽動色稱格天之祥大臣百
執事循默容身者多慷慨許國者少又言邪封曲徑
借曰御筆奏篇束閣報曰旨依室垂罄而襲承平之
用度家四海而事藩邸之結營四年差考公試遷著
作佐郎兼權都官郎官以親老丐外知撫州其治以
正風教扶善良爲先稽簿書覈隱漏以佐糴本造官
舟代募舟以貲爲郎者代郡胥部押言者以爲罪叙
告丐祠不允尋除刑部郎以不善迎合爲中外所攻
寢新命貶一秩淳祐三年復元階六年差知袁州明
年召奏事十年再除刑部郎知漳衡常三州改嚴州

自臨川罷歸食祠者三召者再予郡者五皆不果行
景定二年始召除尚右郎官入對言天下萬事其本
在人主之一心心不一於我則二於物向湖廣淮蜀
四面皆敵今瀘城歸漣海復山東版圖再入職方儆
戒之意得無因是少怠樂身之事得無有切於心乎
兼國史院編脩官實錄院檢討官差殿試覆考官四
年除大理少卿丐外除直寶章閣提舉浙西常平事
有仕者挾權貴求辟舉叔告曰冗員不可增某人不
可舉是冬召奏事再祈免得請歸裝瀟然明年卒叔
告性狷介少和寡合器重之者多而仇疾之者亦不

必云

出名公
事述

李丑父字良翁德昭從曾孫也父宗之通判邵武軍以文名諸史百家口荅疑問人以書厨目之丑父幼穎悟讀書迎刃而解出語輒驚人既授室獨寢夜誦達旦善屬文劉克莊王邁方大琮見大奇之年四十一始領鄉薦端平二年擢第調邵武司戶叅軍添差通判福州丑父嘗攝福州教授士聞其來皆喜遂兼領學事丁大全當軸丑父忤其意遂罷予祠遷著作郎權禮部郎官踰月班對草兩疏首言苛征戚畹黷貨聽諂四事次言競侈二習皆切時弊理宗悉嘉納

之請外提舉湖南常平義倉務存繼絕戶決廢婦父
訟條社倉舊規桂陽有王媪者虜禍時八口爲豪獍
所殺丑父爲直其冤方謀欲劾西全寶慶兩守貪虐
事露爲臺疏劾罷畀祠卒丑父篤實清脩溫良和易
曾次灑然與人無新故一語必用情所得祿賜僅自
給而銖積其餘爲義廩與弟姪共詩文溫潤清新有
集藏於家

述出事

丁伯桂字元暉祖彥先景祐五年進士官終秘書郎
知縣事伯桂兄弟八人伯林伯樟伯梅有聲塲屋皆
貢于鄉伯杞卒於太學生伯桂擢嘉泰二年進士累

遷樞密院編脩官端平改元拜監察御史二年冬除
秘書少監三年遷監遂爲起居舍人兼中書舍人嘉
熙初除權吏部侍郎遷給事中皆兼史職方史彌遠
當國陳宓鄭寅之流皆不安於位於是朝無莆人彌
遠使伯桂始爲御史在言路二年諫疏盈篋皆力扶
世道切中時弊後雖出臺然轉對奏事指陳愈峻
韃靼入寇伯桂言不宜徬徨動色宜凝定以應事變又
言陛下本好賢受諫近者言官忤旨至形詞色疏多
留中易置諫官御史如奕棊此致異之大者又言韓
侂胄除節度使致仕議者謂曷不移此募戰士以

取韓首之首閭美人進封親屬柰何加恩至百餘人
咸人所難言未幾卒

出后村文集

南一字宋傑伯杞子也少爲伯桂所奇平生頗控場
屋寶祐元年年五十七始奏名別院廷試以累舉恩
陞兩科調福州懷安尉公族有僣居以婦墮胎告屋
主者南一辨胎以藥墮坐誣民有負逋自經者子訟
債主南一曰汝父縊死矣誰斷其舌搜其家得舌於
園民有溺死者父訟主家南一曰兩手有泥沙自溺
也人皆服之然以介特忤外臺改東莞監稅帥使謝
子強曰此非所以浼儒者欲處以他職力辭尉卒

盜盜兄以爲辱已擣弟至死誣失主殺之南一辨盜
與失主未嘗交手篙師曬衣墮水死毋誣舡主南一
視衣果在手子強薦之于朝復以忤外臺劾罷貧不
能出嶺嶠南士人率子弟行束脩師事之潛使鄭協
辟爲廉泉書院山長洪天錫至檄攝海陽州學教授
兼文公元公兩書院山長潮州方喜得師而南一以
悼亡歸矣自號斗軒嘗彙伯桂諫草爲若干卷出篇
林彬之字元質其先福州人徙居莆彬之少與王邁
方大琮齊名端平二年擢進士第擢監察御史兼崇
政殿說書首疏天命人才民心次言括田之害曰今

興利於利源旣竭之後立法於法意將盡之餘主以一樞翼以群小恐利未興而害先及又誦皇祐中太常博士張述請立皇嗣語且曰今陛下春秋過於仁宗皇祐時決大議立大本尤不可緩又言彌遠用鄭損棄關而基蜀漢之禍嵩之召比兵入城而兆襄樊之變今主兵之臣以閉門自守爲上策運米浙江以餉兀坐之兵竭財大農以守不耕之野徒曰虜來自去可以苟安豈不中其減水困魚之計九年春雷震大作積陰彌月彬之以爲必有召怨於民者民怨釋則天意回矣遂極陳糾抑權法括田三害其夏四月

朔日食彬之又抗言扶陽抑陰三事十年遷左司諫
會仲冬雷又言一陽方復內卦爲震而有雷聲之異
豈天以此示警爲國本計乎理宗曰朕志已定十一
年春將有事於明堂史嵩之規爲相彬之力言乞扶
公論讀䟽未畢上曰嵩之斷不復用十二年除殿中
侍御史仍侍講首䟽攻臨安尹擅利病民卒移尹越
州又言繼尹余晦不當以私意辱右庠士致三學搢
堂而去罷之後言戚畹數人除權工部侍郎徑出關
上遣都司諭旨乃就職爲殿廬詳定官每緣經義以
規切君德時政會遣余晦諭蜀彬之言晦不可遣丐

外以集英殿脩撰知婺州景定三年以先朝耆舊即
家除寶章閣待制命未至卒彬之事繼母孝始終無
違言居家有檢束立朝無附麗平日謙信若無異同
者及至榻前階下爭辨是非寧忤不辱安於清貧食
不重味身無鮮衣自少至老不輟披讀云

雜出名
公事述

方吳李丁林傳第三十三